

重修廣平府志卷三十一

前事略 兵紀上

周

定王十有三年

宣公五年

六月癸卯晉荀林父敗赤狄於

曲梁

春秋左傳

十有四年

宣公六年

春王

正月晉人滅赤狄甲氏及留吁

春秋

案左傳杜注甲氏赤狄別種通鑑輯覽注在今廣平

府雞澤縣境

靈王二年

襄公三年

六月公會單子晉侯宋公衛侯鄭伯莒

子邾子齊世子光己未同盟於雞澤陳侯使袁僑如會

戊寅叔孫豹及諸侯之大夫及陳袁僑盟

春秋

晉侯之弟揚于亂行於曲梁魏絳戮其僕晉侯怒謂

羊舌赤曰合諸侯以為榮也揚于為戮何辱如之必

殺魏絳無失也對曰絳無貳志事君不避難有罪不

逃刑其將來辭何辱命焉言終魏絳至授僕人書將

伏劍士魴張老止之

左傳

敬王六年

昭公二十有八年

春公如晉次於乾侯

春秋

案經昭公二十九年公至自乾侯居於鄆齊侯使高

張來唁公公以齊卑君復如晉次於乾侯三十年三

十一年皆書公在乾侯三十二年書公在乾侯取闕
十二月公薨於乾侯是乾侯之地魯侯寓此五年也
先是晉定公將以師納之范鞅請召季孫而使私焉
於是意如遂會荀躒於適厯從荀躒如乾侯荀躒以
晉侯之命唁魯侯且請人魯侯卒不肯見意如荀躒
退謂意如曰君怒未怠子姑歸祭於是魯公乃卒於
乾侯矣左傳杜注在魏郡斥邱縣通鑑輯覽云今直
隸廣平府成安縣有斥邱故城春秋晉乾侯邑

十有九年

定公九年

秋齊侯衛侯次於五氏

春秋

案杜注晉地蓋晉大夫邯鄲午之私邑今直隸廣平

府邯鄲縣西有五氏城亦曰寒氏城不書伐者諱伐

盟主以次告也

二十有三年

定公十三年

晉趙稷涉賓以邯鄲叛上軍司馬

籍秦圍邯鄲

左傳

晉趙鞅謂邯鄲午曰歸我衛貢五百家吾舍諸晉陽
午許諾歸告其父兄皆曰不可趙孟怒召午而囚諸
晉陽使其從者說劍以入涉賓不可乃使告邯鄲人
曰吾私有討於午也二三子唯所欲立遂殺午趙稷
涉賓以邯鄲叛夏六月上軍司馬籍秦圍邯鄲邯鄲
午荀寅之甥也荀寅范吉射之姻也而相與睦故不

與圍邯鄲同上

二十有六年哀公元年夏四月齊侯衛侯救邯鄲圍五鹿秋

齊侯衛侯會於乾侯救范氏也同上

二十有八年哀公三年冬十月晉趙鞅圍朝歌荀寅犯師而

出奔邯鄲同上

二十有九年哀公四年秋九月晉趙鞅圍邯鄲冬十一月邯

鄲降荀寅奔鮮虞趙稷奔臨同上

安王十有六年趙敬侯始都邯鄲武公子朝作亂奔魏

與魏襲邯鄲不克史記世家參資治通鑑

梁惠成王八年案是年為周顯王五年伐邯鄲取肥取列人竹書紀年

顯王十有五年魏惠王伐趙圍邯鄲

資治通鑑 史記 作成侯二十一年

十有六年十月邯鄲降魏

同上 史記作成侯二十二年 魏惠王拔我邯鄲

十有八年魏人歸趙邯鄲與趙盟漳水上

同上

二十有二年趙公子范襲邯鄲不勝而死

同上 史記 作肅侯三年

赧王五十七年正月秦王陵攻邯鄲少利以王齮代之

同上

五十八年魏公子無忌救趙大破秦軍於邯鄲下王齮

解圍走

同上

趙平原君之夫人公子無忌之姊也及秦圍趙平原

君使者冠蓋相屬於魏讓公子曰勝所以自附於婚

姻者以公子之高義能急人之困也今邯鄲旦暮降
秦而魏救不至縱公子輕勝棄之獨不憐公子姊耶
公子患之數請魏王敕晉鄙令救趙王不聽公子乃
屬賓客約車騎百餘乘欲赴鬪以死於趙過夷門見
侯生用其計使王所幸如姬竊兵符偕力士朱亥至
鄴奪晉鄙軍下令軍中曰父子俱在軍中者父歸兄
弟俱在軍中者兄歸獨子無兄弟者歸養得選兵八
萬人將之而進王齧久圍邯鄲不拔諸侯來救戰數
不利公子無忌大破秦師於邯鄲下王齧解邯鄲圍
走鄭安平爲趙所困將二萬人降趙公子無忌旣存

趙不敢歸趙王以鄙爲公子湯沐邑魏亦復以信陵

奉公子

同上

秦

始皇十八年大興兵攻趙端和圍邯鄲城

秦本紀

十九年王翦擊趙軍大破之遂克邯鄲虜趙王遷秦王

如邯鄲故與母家有仇怨者皆殺之

資治通鑑

二世元年楚將武臣至邯鄲自立爲趙王

史記秦楚之際月表

二年趙李良襲邯鄲殺趙王武臣張耳陳餘出走

資治通鑑

趙李良已定常山還報趙王趙王復使良略太原秦

兵塞井陘未能前秦將詐爲二世書以招良良得書

未信還之邯鄲益請兵未至道逢趙王姊出飲良望
見以爲王伏謁道旁王姊醉不知其將使騎謝李良
良素貴起慙其從官有一人曰天下畔秦能者先立
且趙王素出將軍下今女兒乃不爲將軍下車請追
殺之良已得秦書固欲反趙因此怒遣人追殺王姊
將其兵襲邯鄲邯鄲不知竟殺武臣邵騷趙人多爲
張耳陳餘耳目者以故二人獨得脫同上
章邯已破項梁乃渡河北擊趙大破之引兵至邯鄲皆
徙其民河內夷其城郭張耳與趙王歇走入鉅鹿城同上

漢

高祖初靳歙破趙軍得其將司馬二人侯四人降吏卒

二千四百人從降下邯鄲

漢書列傳

高祖十年九月代相陳豨反帝自東擊之至邯鄲

資治通鑑

豨自立爲代王劫略趙代上自東擊之至邯鄲喜曰

豨不據邯鄲而阻漳水吾知其無能爲矣令周昌選

趙壯士可令將者白見四人上封各千戶以爲將左

右諫曰從入蜀漢伐楚賞未徧行今封此何功上曰

非汝所知陳豨反趙代地皆豨有吾以羽檄徵天下

兵未有至者今計惟獨邯鄲中兵耳吾何愛四千戶

不以慰趙子弟皆曰善

同上

景帝三年趙王遂反上遣曲周侯酈寄擊趙趙王引兵還邯鄲城守酈寄攻之七月不能下樂布破齊還并兵引水灌趙城城壞王遂自殺

同上

淮陽王更始元年光武持節北渡河進至邯鄲故趙繆王子林以下者王郎爲成帝子子輿與趙國大豪李育張參等入邯鄲立郎爲天子徇下幽冀移檄州郡於是趙國以北遼東以西皆從風而靡

後漢書本紀參列傳

更始二年光武移檄邊部共擊邯鄲

同上

耿弇自薊中之亂與大司馬相失北走昌平說其父况請擊邯鄲况遣寇恂約漁陽軍合定鉅鹿清河凡

二十二縣耿純說秀進攻邯鄲屯其郭北門連戰破之遂拔邯鄲王郎亡走王霸追斬之

同上

後漢

光武帝建武初帝擊銅馬賊吳漢將突騎來會清陽

後漢

書列傳

建武二年檀鄉賊寇魏郡清河遣吳漢等擊破之

資治通鑑

刁子都為其部曲所殺餘黨與諸賊會檀鄉號檀鄉

賊寇魏郡清河帝遣吳漢率王梁等九將軍擊檀鄉

於鄴東漳水上大破之十餘萬眾皆降又使梁與大

將軍杜茂將兵安輯魏郡清河

同上

二年叔壽擊五校賊於曲梁戰歿杜茂擊五校賊進降

廣平又同王梁擊之於清河平之

後漢書列傳

安帝永初五年詔魏郡趙國繕作塢堠以備羌寇

後漢書本

紀

桓帝建和元年清河劉文反殺國相謝暉欲立清河王

蒜事覺伏誅

同上

靈帝中平元年甘陵人反執其王以應張角遣北中郎

將盧植討之六月盧植破黃巾於廣宗

今威縣

宦官誣奏

植抵罪遣中郎將董卓攻張角不剋

同上

植圍張角於廣宗城垂拔帝遣小黃門左豐視軍求

賂不得還言於帝曰廣宗賊易破耳盧中郎固壘以

待天誅帝怒檻車徵植還減罪一等以董卓代之資治

通鑑

十月皇甫嵩與黃巾賊戰於廣宗獲張角弟梁角先死

乃戮其屍

後漢書本紀

梁眾精勇嵩不能尅明日乃閉營休士以觀其變知

賊意稍懈乃潛夜勒兵雞鳴馳赴其陳戰至晡時大

破之斬梁獲首三萬級角先已病死剖棺戮屍傳首

京師

資治通鑑

獻帝初平三年袁紹擊公孫瓚於界橋

威縣北

大破之瓚

還冀

後漢書
列傳

英雄記曰公孫瓚擊青州黃巾賊大破之還屯廣宗
袁本初自往征瓚合戰於界橋南二十里紹將鞠義
破瓚於界城橋斬冀州刺史嚴綱又破瓚殿兵於橋

上

水經注又見
三國志注

四年袁紹軍薄落津魏郡兵反與黑山賊于毒等共覆

鄴城紹因還屯斥邱

資治
通鑑

紹與瓚和引軍南旋三月上巳大會賓徒於薄落津
聞魏郡兵反與黑山賊于毒等數萬人共覆鄴城殺
郡守坐中客家在鄴者皆憂怖失色紹容貌自若賊

有陶升者獨將部眾踰西城入具車重載紹家屬及諸衣冠在州內者身自捍衛送至斥邱紹還因屯斥邱以陶升爲建義中郎將

同上

建安九年四月曹操擊袁尙將沮鵠於邯鄲拔之易陽令韓範舉城降五月操圍鄴城

同上

曹操之圍鄴城也袁譚復背之略取甘陵操與書責以負約與之絕婚女還然後進軍

三國志

晉

惠帝永興元年王浚自幽州遣烏桓羯朱逕至梁期城遇成都王穎將石超敗之

晉書

懷帝永嘉四年二月石勒渡河攻廣宗清河諸縣降勒

者九萬餘口

晉書載記

石勒由襄陽北還廣平太守邵肇等率眾降

同上

四月王浚將祁宏敗漢冀州刺史劉靈於廣宗殺之

資治

通鑑

王浚遣祁宏討石勒及於廣宗時大霧宏引軍就道卒

與勒遇為勒所殺

晉書列傳

六年漢趙固追殺王桑於曲梁

資治通鑑

王彌既死其將趙固王桑自懷求迎於漢漢主聰遣

鎮遠將軍梁伏疵將兵迎之固隨疵而西桑引其眾